



LE GOUVERNEMENT
DU GRAND-DUCHÉ DE LUXEMBOURG
Ministère de la Santé
et de la Sécurité sociale

Äntwert vun der Madamm Ministesch fir Gesondheet a sozial Sécherheet op d'parlamentaresch Fro n° 1994 vum 28. Februar 2025 vum honorabelen Deputéierten Här Sven Clement.

1. Wéi preparéiert sech Lëtzebuerg op potenziell nei Tuberkulos-Infektiounen, déi aus Länner komme kéinten, wou USAID-finanzéiert Diagnos- a Behandlungsprogrammer elo gestoppt goufen
2. Gëtt et op nationalem oder op EU-Niveau schonn en Noutfallplang fir zousätzlech medezinesch Ressourcen ze mobiliséieren, falls d'Ausbreedung vu resistenter Tuberkulos weltwäit zouhëlt als Folleg vun dëser Ënnerbriechung?
3. Wéi ka garantéiert ginn, datt Lëtzebuerger Bierger virun enger méiglecher Erhéijung vun der Tuberkulos-Bedrohung geschützt sinn, besonnesch wann d'Diagnos- an d'Behandlungsprogrammer an Héichrisiko-Länner amgaang sinn zesummenzefalen?
4. Wäert Lëtzebuerg zousätzlech finanziell Ënnerstëtzung ubidden, fir den Ausfall vun den amerikanesche Gelder fir Tuberkulos-Bekämpfung ze kompenséieren?
5. Ginn konkret Moosssname geholl, fir eist Gesondheitswiesen op eng méiglech méi héich Unzuel u Fäll ze preparéieren?

D'Iwwerwaachung vun Tuberkulos-Infektiounen ass schonn etabliert, esou dass Situatiounen, wéi se vum honorabelen Deputéierte beschriwwen goufen, entsprechend kënne geréiert ginn.

Follgend Prozedure sinn am Asaz:

Laut dem Gesetz vum 1. August 2018 iwwert d'Deklaratioun vu verschiddene Krankheeten am Kader vun der Protektioun vun der Santé publique, mussen esouwuel d'Doktere wéi och d'Laboratoiren, déi medezinesch Analyse maachen, Infektiounskrankheete wéi Tuberkulos innerhalb vun engem Dag bei der Gesondheitsdirektioun deklariéieren.

D'Demande fir eng Openthaltsgeneemegung vu Persounen aus Drëttstaaten (also net EU-Memberstaaten, dorënner och d'Länner, déi vun der genannter US-Moosssnam betraff sinn) ënnerläit enger obligatorescher medezinescher Kontroll¹. Dës ëmfaasst souwuel eng allgemeng medezinesch Ënnersichung wéi och en Depistage vun der Tuberkulos.

En änleche Kontroll (medezinesch Ënnersichung an Depistage vun der Tuberkulos) ass virgesi fir Lait, déi als sougenannten «Demandeur de protection internationale » op Lëtzebuerg kommen².

Am Joer 2023 goufen 1.615 positiv IGRA Tester (Interferon Gamma Release Assay) deklariert, also latent Tuberkulosinfektiounen detektéiert³. Wéi uewen erwänt, ass dësen Test erfuerderlech fir Persounen aus Drëttlänner, déi eng Openthaltsgeneemegung oder internationale Schutz wëlle kréien. Persounen, déi

¹ Règlement grand-ducal du 3 février 2009 sur le contrôle médical des étrangers

² Loi modifiée du 18 décembre 2015 relative à la protection internationale et à la protection temporaire

³ [Rapport épidémiologique des maladies transmissibles au Luxembourg - 2023](#)



mat Tuberkulos infizéiert sinn (IGRA positiv), hunn ongeféier 5-10% Risiko, eng aktiv Krankheet an de Joren no der Infektioun oder bei enger liichter Ofsenkung vun der Immunitéit ze entwéckelen. Wat aktiv Fäll vun Tuberkulos ugeet, goufe 46 Deklaratiounen bei der Gesondheetsdirektioun am Joer 2023 enregistréiert.

An deem Kader weist d'*Organisation mondiale de la santé* (OMS) drop hin datt d'Budgetkierzunge vun UNAID sech bedroech op d'Programmer géint d'Tuberkulos kéinten auswierken an dëst besonnesch an aarme Länner wéi an Afrika, Südostasien an dem westleche Pazifik, Regiounen déi am meeschte betraff sinn⁴. Esou ass et wichteg dës Krankheet weider z'iwwerwaachen. Dës Iwwerwaachung ass Deel vun de Missiounen vun der Gesondheetsdirektioun, a méi spezifesch, der Divisioun vun der Inspection Sanitaire, am Kader vum Schutz vun der ëffentlecher Gesondheet a ginn dementspreechend organiséiert a geréiert.

Wat Noutfallpläng betrëfft, ass e Gesetz iwwer d'Santé publique amgaang elaboréiert ze ginn. An der Tëschenzäit schafft d'Gesondheetsdirektioun un engem operationelle Plang fir all Acteur, deem epidemesch a biologesch Risiken adresséiert.

Fir de Moment ass d'Inzidenz vun der Tuberkulos zu Lëtzebuerg niddreg. D'aktuell Moossname ginn duer fir déi Situatioun zefriddestellend ënner Kontroll ze behalen.

Lëtzebuerg, den 27. Mäerz 2025

D'Ministesch fir Gesondheet
a sozial Sécherheet

(s.) Martine Deprez

⁴ [Funding cuts impact access to TB services endangering millions of lives](#)